



Acsni  
chinchokocha ju  
Jesús ju lak'achak'an  
Betania pus  
lakachaxanca' avilhchan  
ixtic'acxaca' acsni  
cajunach ju anu' c'atan  
ju lak'achak'an Jerusalén.  
Ju Betania ixlak'achak'an ixjunita  
ju anu' Lázaró ju ixnita chai  
ixlok'onchokota la'ixtachaput ju Jesús.



Ju acsnich ju  
Malia ch'apalh  
paitat kilo ju na  
saksi c'uch'u ju va  
ach'itin ixnavicanta chai  
na laklhu ixtapalh  
ixjunita. Chai ju yuchi  
ch'anmuc'alh la'ixch'anch'aja' ju  
Jesús chai lhich'anxaca la'ix'ai.  
Pus ju chaka' na c'us  
pulac'acamilh ju lacac'uch'u.



Ju Judas Iscariote pumatam ixlhipumacaut'ui'an  
ixjunita. Pus ju acsnich ju yuchi alak'alh ju xalack'ajin  
palijni. Alh at'atak'oxini' ta yu laich capumak'axt'ak'a'  
ju Jesús. Chai ju yu'unch acsni  
tak'asmatlh ju ixchivinti ju  
Judas na talack'achalh.  
Tamach'anulh. Tajunilh ju  
Judas ni cataxtakniya' ju  
tumin. Pus ju Judas  
tus acsnich na  
ixpuxcajui ta  
yu laich  
capumak'  
axt'ak'a' ju  
Jesús.




Pus ju ix'amamaka'ui ju Jesús ta'alh  
chai tanavilh tachi ju ix'ajunita ju  
Jesús. Chai talak'oxilh ju  
ixpuc'atanit'an. Chai acsni ixtat'ajun  
venin pus ju Jesús ch'apalh ju  
xkapavati chai xtaknilh lak'ailakts'iuch  
ju Dios. Chai astan lacch'ek'elh.  
Chai axtaknilh ju ix'amamaka'ui.  
Chai ajuni: –A'ut'itch.  
Ju ani yuchach  
ju quilacatuna.




Chai astan ch'apalh tam vaso ju  
vino. Xtaknilh lak'ailakts'iuch ju  
Dios. Chai axtaknilh ju yu'unch.  
Chai ajuni: –Ak'ot'it minchux'an.  
Ju yuchi qui'ac'alhni. Chai acsni  
cataxtuya' ju yuchi pus  
capumavasalaya' ju sast'i chivinti ju  
ca'alact'atak'oxiya' ju Dios ju lapanacni  
ni laich ca'amac'acxaniya'  
ix'alactu'unti'an  
na lhu lapanacni.



Chai ju Jesús vachu' chani junilh ju Pitalu': –Simón ju lhacaticuru tasq'uinitanch ni laich cata'ulhtuyan tachi ju ulhtucan ju tu'u' trigo acsni c'alhacan. Pus va yuchi ju xa'amacxtalh ju sun lhi'an ju un. Para ju xatrigo jantu. Pus ju lhacaticuru talakts'intanuputunan ni aquilac'ap'auch u aquilalhilaksik'alhiyau. Para ju quit'in ictapaininita ju Dios ju milacata'an ni jantu lana aquilac'ap'auch.



Chai acsni aq'uinch'ak'ok'ach'ok'oya'ich ju uxint'i pus  
a'akt'ai'ut'ich ju milhi'alak'avin ni vachu' ixlhichux  
ix'alhunut'an aquintalhilaksichokoya'. Para ju Pitalu'  
junich: –Qui'ucxtin ju quit'in aclhilak'a'iyach mas  
act'at'alhnucanch. U mas act'aniyanch. Para ju Jesús  
junich: –Pitalu' icjunan ni chavai atats'isni acsni tuca'  
t'asai ju puyux pus  
pakt'utu ju na'unt'a  
ni jantu q'uimisp'ai.



Pus ju acsnich ju  
Jesús alact'acha'alh ju  
ix'amamaka'ui junta  
Getsemaní juncan.  
Chai alacjuni ju yu'unch:  
–At'olat'itca' ju ani.  
Chactiquit'achivinin ju Dios.  
Chanich ju juni: –Quimpai  
ju uxint'i lai navik'o'ui tachi  
chun ju taxtokni.  
Aq'uimak'osunin ju ani  
mak'alhk'ajnat ju slivasalh na  
ts'inq'ui. Para jantu anavit'i  
tachi ju iclacasq'uin ju quit'in.  
Va yuchi ju anavit'i tachi ju  
anona' ju uxint'i.



Judas ju ap'ulhnilh ju ixtaropajni ju k'ai ucxtin chai  
ixtaropajni ju xalack'ajinch palijnich chai ju fariseonin.  
Pus ju yu'unch ixtalhi'anta ixlacmachcu'an chai  
ixk'a'ichi'an chai ixmachita'an. Chai pumatam  
sia lhiyu'unchach mac'atsani ju  
ixlapanac ju xak'ai pali.  
Chakxp'uxnilh ju ix'ak'axk'olh  
ju ixcatucana. Para ju Jesús  
juni: –Chach va anch  
lhitamactalh. Chai ju Jesús  
ch'apalh ju ix'ak'axk'olh ju anu'  
lapanac chai lana  
catumuc'achokolh.



Pus tach'apalh ju Jesús. Talhi'alh chai tamanucha  
la'ixchaka' ju xak'ai pali. Pus ju Pitalu' va ixlhimakat  
ch'ak'ok'alh. Pus ju ali'in ixtamalhculatach  
ixpulacni ta  
ixlakachak'axnucanta ju  
ixchaka' ju xak'ai pali.  
Chai ixtalacsk'onvilanalh.  
Chai vachu' ixmakvi  
ju Pitalu'.



Chai ju pumatam  
ixlapanac ju xak'ai pali  
ixlhilak'au ixjunita ju  
anuch ju  
catuchakxp'uxlh ju  
Pitalu'. Yuchach ju  
sacmichokopa ju Pitalu'.  
Junich: –Ja jantu  
iclakts'inchan ju lacapu'olivos  
junta ixvilhcha ju anu' lapanac.  
Pus ju Pitalu' aktam nonchokopa  
ni jantu mispai. Chai lanach t'asalh  
ju puyux. Pus taxtulh ju Pitalu'  
chai na p'as tsuculh k'alhunu'.



Pus ju acsnich ixchux'an ju  
xalack'ajin sia yu'unch  
ju israelitanin talhi'alh ju Jesús  
la'ixpu'ucxtin ju Pilato. Pus ju yuchi  
ix'ucxtin'an ixjunita ju  
romanonin. Pus ju  
acsnich ju Pilato sacmilh  
ju Jesús. Junich: –Ja  
uxint'ich ju ix'ucxtin'an  
ju israelitanin.





Chai ju Jesús junich: –Chunch  
tachi ju na'un. Para ju Pilato ni va  
ixmacomputun ju Jesús pus aktam  
axak'alachokopa ju ixtalhavat'an  
lapanacni. Para ju  
yu'unch na p'as  
ixtanonchokopalai:  
–Amaq'uilht'at'ich ju  
lacacurus.



Pus ju Pilato acsnich ju mak'axtaklh  
ju Jesús la'ixmaca'an ju lapanacni  
ni catamaknilh ju Jesús.

Ta'amaklhtayanalh ju Jesús.

Talhi'alhch. Chai tamakxk'ok'alh ju  
iscurus ju Jesús. Talhi'alhch junta  
ixjuncan Aktsulh. Ju lacalhihebreo  
ixjuncan Gólgota.




Anchach ju tamaquilhtachalhch ju  
Jesús chai ju ali'inch ixt'iyun'an.

Ju pumatam la'ixlhicana ju  
maquilhtacalh la'iscurus chai

ju apumatam  
la'ixlhimacx ju  
maquilhtacalh  
ju la'iscurus.


Chai ju Jesús  
tamaquilhta la'ixlacaitati.



Va ts'ank'alh ju avilhchan. Chai ju lacpujitat ix'alín  
lakatam k'ai pumpu' ju ixycanta ni pulact'ui  
ixpunavicanta. Pus ju acs pants'iquis pus lana lht'it  
tak'exlh ju anu' pumpu' la'ixlacaitat.

Chai ju Jesús ts'au t'asalh.

Chai naulh: –Quimpai  
lamimaca' icmak'axtakniyan  
ju quintacuvín. Chai acsni  
naulh ju chunch  
pus lana nilh.



Chai acsni tats'isi pus ju José  
amachaka' Arimatea caplich ju  
ixtalhanti chai lak'alh ju Pilato  
chai sq'uinlh ju ixlacatuna  
ju lijunto Jesús. Pus  
ju José makyu'unch  
ixjunita ju xalack'ajin  
sia yu'unch ju  
israelitanin.

Chai chux ju  
lapanacni  
ixtalhilaksi ju  
yuchi. Vachu'  
ixpacxan  
ju anu' avilhchan  
acsnicalhionk'oya' ju  
Dios ju ani lacat'un.



Pus ju José tamaulh lakatam lhman  
pumpu' ju na k'ox ixjunita. Chai  
acsni p'uxcalh ju ixlacatuna ju  
Jesús pus pupach'icalh  
lacialhman pumpu'.  
Quimacnulh junta  
ixpulhucucucanta ju  
lactalhpa.

Lhimalacch'aulh  
lacialakatam k'ai  
lhk'ajana chiux junta  
tamacnu.



Ni viernes ixjunita pus ju lapanacni  
ixtalak'oxik'ota ju ixvaiti'an Ixlacata  
ju k'ai c'atan. Chunch  
ixtalai ni jantu lai  
catitach'alhcatnalh ni  
catuncuna'. Pus ni  
tuncunchokolh mas  
na k'ai c'atan  
ixjunita para

tatak'aixtokli  
ju xalack'ajin  
palijni chai  
ju fariseonin.



Talak'alh ju Pilato. Chai tajuni:

–Ji qui'ucxtin icpastacvi ni ixnajun  
ju anu' a'okxchok'onu'  
acsni ixt'ajunca' ni  
ixlhilakat'utu avilhchan  
ma calok'onchokoya'.  
Pus ta'alh ju  
yu'unch.



Chai talak'oxilh junta acnuich ju  
Jesús. Tach'ilh ju chiux ju  
xamalhtich ixnavicanta  
chai tat'alamlakxtoklh  
ju talhpa. Vachu'  
ta'ula ju taropajniyu  
catalhistaclich ju  
malhtich.



Pus acsni tapasalh ju anu' avilhchan  
pa'astacni chai ixt'ajun  
tuncuntilana' ju lhitumincu  
pus ju Malia amachaka'  
Magdala chai ju k'antam  
Malia ta'alh lakts'inin  
junta ixmacnucanta  
ju Jesús. Pus na  
p'as tataclh ju  
lacat'un.

Chai ix'anquilh  
ju Dios mincha  
lact'iyan chai  
mak'osulh ju chiux ju  
xamalhtich ixjunita  
junta ix'acnui ju  
Jesús.



Chai ucxtavilh ju chiux. Chai ju  
taropajni acsni talakts'ilh  
slivasalh na tatalhanalh tus  
ta'axq'uip'ip'itnik'o. Chai  
lana tatatist'alh tachi ju  
va tanilh.



Pus ju acsnich ju anquilh axak'ala ju  
chakolun chai alacjuni: –Jantu  
at'alhanant'it ju uxijnan.

Icc'atsai ni Jesús ju  
p'uxc'oyat'it ju  
maquilhtacalh  
lacacurus. Para  
jantu ani vi.

Lok'onchokotach  
tachi ju

ixnajun. At'at'it. Alakts'int'it  
junta ixmacnucanta ju  
ixlacetuna.




Pus ju acsnich ju anu' chakolun  
tatasp'itchochocha junta ixmacnucanta  
ju Jesús. Na ixtatalhananta ni  
ixtalakts'inta ju anquilhnin. Para  
na ixtak'achanch ni tac'atsa ni  
lok'onchokotach ju Jesús.



Pus ta'ats'ala'alh ajuninin ix'amamaka'ui  
ju Jesús ni lok'onchokota ju yuchi. Para  
acsni ixta'antaca' ju lacati pus ju  
Jesús alacpakxtoklh. Amac'ami.  
Pus ju yu'unch lana talak'alh chai  
tach'anlakatanu. Talak'aya.





Astan ju Jesús alactalacasunilh ixpumacautam'an  
acsni ixtat'ajun venin. Pus alhilak'ak'aima ni na p'as  
ixjunita ix'alhunut'an chai lana jantu lai ixtalhilaksita ju  
ixchivinti ju ix'ajunita acsni tuca' ixmaknicanta. Vachu'  
alhilak'ak'aima ni jantu tavanan ixtaquiclaca'ita ju  
yu'unch ju ixtalakts'inta ju Jesús acsni  
ixta'acxtuchokota junta ixmacnucanta. Astan acsni  
alact'achivink'o ju ix'alacmamaka'ui pus ju k'ai  
ix'ucxtin'an Jesús lana Ihi'ancalh tus lact'iyan  
chai tavi vanin junta vi ju Dios.



Ju Dios chunchach  
ju apumapaini ju lapanacni ju ani  
lacamunutpa' ni quilhitap'uxlh ju quit'in  
ju lakatami ists'alh icjunita. Ju chunch  
tachi chun ju aquintalhilaca'anach  
jantu cats'ank'aya'.  
Alin is'atsucunti'an ju  
conk'alhiyanta  
lact'iyan.



ROMA 3:23 Chux ju quiinnan'an ju lapanacni juntau  
alactu'ununtauch. Jantu xamati' ju vasalh soknic'a cava  
tachi ju lhcatlach ju Dios.

ROMA 6:23 Ju ixlhimapalhcan ju alactu'unti yuchi ni ancan  
junta jonk'alhita mak'alhk'ajnat. Para ju ixlhak'ailakts'inch ju  
Dios yuchi ni alinch ju qui'atsucunti'an ju conk'alhiyanta ju  
lact'iyan va ixlacata ni va lakatam t'ajuntau ju qui'ucxtin'an  
Jesucristo.

JU ISRAELITANIN 9:27 Pus ju Dios lhca'ulata ni va  
paktamch ju tani ju lapanacni chai astan  
ca'amak'osaspitcanach.



EFESO 2:8,9 Tak'alhtaxtutauch lacamak'alhk'ajnat junta jonk'alhita va ixlaca'atalh ni quinta'aktaijutanch ju Dios laca'amapaininti acsni lhilaca'antauch ju Cristo. Para jantiyu' quintalhinavinitan church va ixlaca'atalh ni navitau tu'u'. Alai va quintalhik'ailakts'intan ju Dios ju ix'amapaininti. Jantu lai putak'alhtaxtuyau va ixlaca'atalh ni canaviuch ju k'ox. Ni lai church cava ixputak'alhtaxtu pus ca laich ixtalhitak'aya ju ali'in ni ixtac'atsa ni laich ixtatak'alhtaxtulh va la'is'akstu'an.

ROMA 10:9,10 Pus ni anona' ni yuchi ju mi'ucxtin ju Jesús chai ni alac'a'iya' ju lami'alhunut ni Dios ju macxtuchokolh ju Jesús acsni ixmacnucanta pus at'ak'alht'axt'uya' chai jantu at'ip'it'i ju lacajipi. Ni xamati' lhilaca'an ju Cristo la'ix'alhunut pus lakts'incan ni salaka ju ix'alhunut la'ixmacni Dios. Chai ni najun ni lhilaca'anch ju Cristo pus tak'alhtaxtutach chai jantu cati'alh ju lacajipi.



XIVAN 3:16,17 –Ju Dios chunchach ju apumapaini ju lapanacni ju ani lacamunutpa' ni quilhitap'uxlh ju quit'in ju lakatami ists'alh icjunita. Ju chunch tachi chun ju aquintalhilaca'anach jantu cats'ank'aya'. Alin is'atsucunti'an ju conk'alhiyanta lact'iyan. Ju Dios jantiyu' quilhimacamilh ju ani lacamunutpa' ni va ac'ulanilh ixtalak'alhin'an ju lapanacni. Para alai va quilhimacamilh ni laquimacni cataputak'alhtaxtuyach ju lapanacni.



1 XIVAN 5:11-13 Pus chani najun ju Dios: “Ma quintaxtaknitan ju qui'atsucunti'an ju conk'alhiyanta tus lact'iyan. Chai ju ani atsucunti ma quintaxtaknitan acsni lhilaca'antauch ju ists'alh”. Ma chunch najun ju Dios. Pus ju ixlhichux ix'alhunut maklaca'anita ju ists'alh Dios alin ju is'atsucunti ju conk'alhiyanta lact'iyan. Para ju jantu ixlhichux ix'alhunut maklaca'anita ju ists'alh Dios pus mati' ju is'atsucunti ju ca'ixjonk'alhicha ju lact'iyan. Pus ju ani taxtokni icla'ats'oknuniu ju uxijnan ju maklac'ap'init'at'it ju ists'alh Dios. Chai yuchi iclalhi'ats'oknuniu ni ap'uc'ats'aya'it'it ni alin ju mi'atsucunti'an ju conk'alhiyanta ju lact'iyan.



MATEO 26-28; LUCAS 22-24; XIVAN 13-21

Storyline by: Edward D. Hughes

Illustrated by: Janie Forest  
and Alastair Paterson

Adapted by: Lyn Doerksen

Tepehua Huehuetla NT (tee) © 1976, Wycliffe Bible  
Translators, Inc. All rights reserved.

<https://live.bible.is/bible/TEETBL/MAT/1>

©2025 Bible for Children, Inc.

[www.M1914.org](http://www.M1914.org)

[www.bibleforchildren.org](http://www.bibleforchildren.org)

